

■ COLUMNA

Mes auto dauda a mai e mes chastis era

DA LUDMILLA CAHENZLI

Jau, Ludmilla Cahenzli, sun ina emanza tras e tras. En il perchasa fatsch jau mo tant sco mes um, en l'educaziun dals uffants sun jau pli autoritara che mes um e mes biro amel jau gist uschè fitg sco mes um la Côte d'Azur. Ma en in regard n'hai jau betg cuntanschì mias finamiras emancipatoricas ch'jau aveva sco giuvna cura ch'jau legeva l'Emma dad Alice Schwarzer. En quest punct sun jau dependenta da mes um.

Jau discor da l'auto. En sasez fissi mes auto. Jau dovr el mintga di, jau tanchesch el e na lavel mai el. Gliez na disturba anc betg mes um Eugen Cahenzli, el ha gea ses agen auto. In pli grond, in pli char ed in ch'el po lavar mintga sonda. Il problem è: Mes auto era stà pli baud noss auto communabel ed el è anc adina registrà sin il num da mes um. Questa inconsequenza en mia biografia – tras e tras emancipatorica – chaschuna savens tensiuns en nossa lètg.

Eugen è in pulit schani. El cuschina bain, gudogna bain e na fa betg grondas caneras. Ma el ha sias flavlezzas. El reagescha fitg sensibel, sch'i vegn en chasa brevs cun cedels verds u rosa. Cunzunt sch'ils quints vegnan da la polizia, èn adressads ad el, ma chaschunads da mai, Ludmilla Cahenzli. Lura fa mes um – uschiglio in bunatsch – adina sfratgs.

En quest connex stoss jau forsà anc dir insatge davart mes stil dad ir cun auto. El è rassig, lessig, emancipatoric. Jau sun in

tip che suonda sias finamiras cun in tschert schlantsch. Sch'jau hai per exempel dad ir a far cummissiuns, fatsch jau quai a moda dinamica per suenter pudair passentar bler temp en mes biro ed avair là mes ruaus. E sch'jau vom cun auto a far cummissiuns, scriv jau avant mes egl intern adina la glista da comprar en.

Jau nodel avant mes egl intern: jogurts da mocca, palpiri da tualetta, brekkies per ils giats. La glista cuntegna per il solit passa ventg chaussas ed jau ma stoss concentrar per tegnair endament tut. Perquai n'èsi simplamain betg pussaivel d'anc far stim da mintga tavla a l'ur da la via.

Mes um n'ha insumma Mnagina chapientscha per las glistas avant mes egl

intern. Mintga giada sch'i vegn puspè in chasti da la polizia fa el sco sch'il mund gies sutsura. «Puspè in chasti! Sas tge che quai custa! E puspè avant il Migros! Gia la sisavla giada! Betg da crair! Ti sas doch exact ch'i ha là in blitz.»

Suenter tals intermezzos fatsch jau adina il propiast da ma liberar ord la dependenza da mes um e da registrar mes auto sin mes agen num. Tut tenor il princip emancipatoric: Mes auto dauda mo a mai! E mes chastis grad era! Ma lura emblid'jau puspè da midar la registraziun. Fin ch'i camedia la proxima giada dad ir en il Migros. Gliez hai fatg avant paucs dis. Jau sun ida smaladet spert. La brev da la polizia n'è anc betg arrivada. Tgi sa, forsà prendan els uss davent ad Eugen la lubientscha da charrar.

